

तुबारि संपादकीय
टीम

◆ अस इ उम्मिद करूं लगे से कि एण बाड़े रोज अन्तर सुआ मेहणु इस कम अन्तर सहयोग कते।

◆ इस तुबारि मासिक पत्रिका समाचार पत्र एक्ट अन्तर रिजिट्रि नेई भो। सिर्फ पांगी घाटि अन्तर पढ़ूं जे इ पत्रिका शुरु कियो असी।

◆ तुबारि एक अवाणित्यिक पत्रिका भो।

◆ तुबारि पत्रिका कोई मेहणु, जनजाति, त संस्कृति गलती कहेण जे नेई छपाण लगे। अगर कोई ई सोचता बि त अस जिम्मेवार नेई।

◆ छपाणे पेहले सोब आर्टिकल दुई टाई पांगेई मेहणु हरालो असे। इ त खुलि बोक असी कि पेहली वार पांगवाडी लिखणे सुआ सुशकिल भुन्ती त गलती बि भुन्ती। अगर कोई लिखणे गलती असी त असी जे जरूर बोले। त अस तसे हारे संस्करण पुठ ठीक करणे कोशिश कते।

◆ आर्टिकल ना मिले, या घाटि मेहणु के मदद ना मिले त तुबारि पत्रिका कदि बि बंद भुई सकती।

◆ कोई चीज छपां असी या नेई छपां जे तुबारि संपादकीय टीम पुरा अधिकार असा।

◆ अस किलाड केन्द्रीय पुस्तकालय, त बजार राखे ठेके भेण्डे हरिरामे दुकान अन्तर तुबारि ड्रॉप बॉक्स पुठ बि अपुं सुझाव त आर्टिकलस रखूं जे सुविधा कियो असी।

◆ अस सोबी पांगेई मेहणु जे हात जोड कइ निवेदन कते कि, तुस बि कोई अच्छा आर्टिकल, पुराणी या नोवी कथा, कहावत, कविता, त नोवे घीत (पंगवाडी अन्तर) लिख कइ छपां जे हेंन दिए।

तुबारि संपादकीय टीम

9418431531

9418429574

9418329200

9418411199

9418904168

9418721336




हिमते बाड़े गभुर

कतिक ठाकुर गां चौकी

हियुंते टेम थिया। अक्षय त तसे भेण अंकिता गी अकेले थिए। तन्के ई-बोड यक गां बियाह खाण जे गओ थिए। दुहे गभुर खांजे खाई कइ होता उंघो थिए। तउं तन्हि बहरी जोरि-जोरि हुशरि शुणी कि 'हेरे-हेरे सरिता चचि गी आग लगे असी'। सरिता चचि कुवा त तसे दाँदी अन्तरे रेहि गओ थिए। तन्के कना कसेरी ध्यान ना थिया।

तउं अक्षय त तसे भेणि ध्यान तन्के कना गा। तउं तन्हि दुहि भाई-भेणि यक बोडा लोड टाता। तउं से दुहे जेई लोडे बइ दवार पुठ जोरि-जोरि देण लगे, त दवार टूट गओ। तउं से दुहे भाई-भेण आगे लपट पुठि बइ दौड दी कइ अन्तर गए। मेहणु तन्हि अन्तर घेण केआं रोकुण लगे थिए, पर से ना रुके। तउं मेहणु सोचुण लगे कि अब त शायद कउं बचियाल? किस कि आगे लपट सुआ बधती गओ थी। अक्षय त अंकिता दुहि दाँदी हतऊ केआं टाती त से गभुर कलाहि कर कइ पंतुई दवारे बइ सुसुर बहर निस गए। तन्हि सुसर हेर कइ सोब जेई खुश भोई गए।



आस्तीने कीड़ा

अनुवादक: भागेश, गां परमस

बोक सुआ साले पुराणी भो। यक राजे राज्य अन्तर रोज यकक सिपही मौत भुण लगे थी। मौत युध्द अन्तर न बल्कि महेल अन्तर भुण लगे थी। राजे चिंता भुण लगी। सेनापति रोज ऐन्ता त महाराज सिपही के मौते खबर शुणता। 'महाराज-महाराज आज फिर महेल अन्तर कनि सिपही मार छड़ा।' महाराजे बोलु, 'कउं भो ए दुष्ट मेहणु? एतु पहेरा देणेबाडे असे फिर बि कोई फर्क नेई न?' रोज मौत भुण लगे थी, त हालत सुआ खराब भोई गओ थी। सिपही महेल अन्तर पहेरा देण जे बि नाह करण लगे थिए।

राजे यके कुआ थिया। तेस नउ विष्णुकांत थियु। विष्णुकांत महेल अन्तर पुजा त बोड उदास हेर कइ पुछु 'कि कियो असु'। महेले हाल शुण कइ विष्णुकांत बि चिंता भोई गई। मौति के पूरी खबर शुण कइ हैरान भोई गा कि मौत सिर्फ तेस सिपही भुतीथ जे अकेला पहेरा देन्ताथ। असे मतलब साफ थिया कि मारणेबाडा यक-यक सिपही मारताथ। से सोभि के समाड़ी न निसताथ। राज कुमारे



सिपही जे आज्ञा दिती 'अकेले कोठि खाखइ न बिशुण। पंज-पंज सिपही कठे पहेरा दिए।' राज कुमारे आज्ञा मान कइ पंज-पंज सिपही कठे बिशण लगे त कसेरी मौत न भुई त सोब खुश थिए। यक रोज राज कुमारे सेनापति भिआ त बोलु 'सेनापति! मोउं लगतु कि हत्यारा नश गा। अब आधे सिपही लंघाई छइ अब अत सिपही के जरूरत नेई।' राजे बोलु 'ना-ना ई करणे बेलि सुआ खतरा असा किस कि से हत्यारा फिर सिपही मारणे कोशिश कता।' राज कुमारे बोलु 'अब से ई कोशिश न कता।' बोडए बोलु 'कोइया पल भरे कमयवि घमण्ड न करण। अगर तउ भरोसा नेई त पंतुई दवार पुठ यके सिपही पहेरा देण छइ।' राज कुमारे तिहिरु कियु, पंतुई दवार पुठ यके सिपही पहेरा देण छइ।

सेनापति पतुई दवारे हाल हेरण जे गा त दवार पुठ अकेला सिपही थिया। सेनापति बोलु कि 'सिपहीआ डर त नेई लगो।' सिपही बोलु 'जी ना सेनापति।' सेनापति बोलु 'शबशा।' अजगता सेनापति पतुं जे मुडा त सिपही कियड़ी केआं टाई छडा त तसे पेट पुठ तलवारी बई दिती। पर सेनापति हथ केआं तलवार छुट गइ किस कि सिपही लोहिए पक्का कवज लओ थिया। सेनापति किछ समझ ऐन्तु तेस केआं पहेलाइ सिपही तसे कियड़ी पुठ तलवार रख छई त हसते-हसते बोलुण लगा 'मोउं लगुतु कि तेई अउं ना पिछाणा।' ई बोल कइ राज कुमार अपु मुँह केआं नकाब खोल छडा। 'राज कुमार, तुस भींथ ना!' सेनापति डर कइ का भोई गा। राज कुमार बोलु, 'मोउं पहेलाई शक थिया कि भो न भो तुईए आस्तीने कीड़ा भो।' सेनापति बोलुण लगा 'मोउं माफ करे, राज कुमार जी।' तउं सेनापति गिरफदार कर कइ जेल अन्तर छई छडा। तदेया पता राज महेल अन्तर सोब जेई सुखशान्ति जुए बिशे। बोते ना कि कीड़े जतु बि दुद पिए पर डसुण न छता।



टशो काग

अनुवादिका: मॉनिका, चौकि

बरशाड़े दन थिए। यक काग टशो थिया, त इए-ओ उडरण लगो थिया। तेन सुआ जगाई पुओणी तोपु, पर तेस कोठि पुओणी न मेऊ। पता से पुओणी तोपते-तोपते यक बर्गीचे पुजा। तठि तेन यक घडु काऊ। से घडु केई पुजा। तेन घडु अन्तर पुओणी काऊ। पर पुओणी सुआ टुनि थियु। पणि तकर तसे ठुंग न पुजतीथ। तउं तेन घडु अन्तर सुआ शकरि छेई। शकरि छई कइ पुओणी खड़ी एइ गओ। तउं कागे पुओणी पियु त खुश भोइ कइ अपु गुहले जे घेइ गा। तउं त बोते जठि चाह असी तठि राह मेईए घेन्ती।



माघे त फोगुणे तिहार

विनोद, ग्रां :सेरी भटोस

फोगुण	दिनांक	शीते बुढी -	पनिहारे कुडी, टुनुर	दिनांक	मन्घे
फोगुण	18	शीते बुढी -	चोउरे जेटुण	01 मार्च	बुध
फोगुण	19	शीते बुढी -	बकरे केँ,	02 मार्च	लेसपत
फोगुण	20	शीते बुढी -	कुण्हिए देहेर	03 मार्च	शुकर
फोगुण	21	शीते बुढी -	टीए जेटुण,	04 मार्च	शणेहचर
फोगुण	22	शीते बुढी -	कला नागणी; रेखि शरवाठि,	05 मार्च	ऐतवार
फोगुण	23	शीते बुढी -	चौक टन, उगिर शरवाठ	06 मार्च	सुमार
फोगुण	24	शीते बुढी -	जहरु खन, पुने शरवाठ	07 मार्च	मन्घे
फोगुण	25	शीते बुढी -	चैत्रे धनीस	08 मार्च	ऐतवार
	30			13 मार्च	

डाक्टर अधरात अपु जुएली जे बोलुण लगा ...।

रोहित, चौकी

अउं हसप्ताइ जे घेन्ता।
यक ईमरजेंसी असी।



कसे त अपु मौंति
मरण दे...!

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

सोभि पंगेई मेहणु के छने -अरे कते हियुंत मेहना लगो असा त सुआ ठन्यारी असी। तिहार बि लगो असे त सुआ अराख न पिए। अपु कुई-चीड़ी त सकि नति जोइ तिहार मनाए। सुआ अराख पी कइ अपु सेहद खराब न करें।

